

重修兩淮鹽法志

兩淮鹽法志卷六

王制門

德音上

功令權鹽因明法而去其煩苛順治初卽蠲明末加增  
加派等名自是以來商人慶幸寬大之政踊躍輸將輒  
邀優敘閒遇綱引滯銷場災岸厲無不去苛釋害酌盈  
劑虛因時消息悉本

宸衷

恩施洋溢猗歟休哉然淮綱之敝極於嘉慶之末其後膺鹽政  
者幾窮於術惟知乞

恩

宣宗嘗諭臣工曰乞恩二字孰不能之又曰國家經費有常不得爲調劑目前之計屢請乞恩也

天語煌煌觀於此編者其永念之哉志

德音

順治元年奉

恩詔一鹽課前代天啟崇禎年間加派名色甚多深爲商厲今著盡行蠲免止按萬厯年間舊額按引徵課

順治二年奉

上諭各運司鹽法明末遞年加增有新饟練饟及雜項加派等

銀深爲厲商今盡行蠲免止照舊額按引徵收本年仍酌免三分之一特諭

順治八年三月初八日奉

上諭朕覽巡鹽御史崔允宏章奏因思各處報鹽課中常報有餘銀若干細思鹽課正額自應徵解若課外餘銀非多取諸商則侵克於民大屬弊政傳戶部都察院通行各鹽差御史及各鹽運司止許徵解額課不許分外勒索餘銀有御史及運司各官貪縱者許商民首告審確奏聞治罪用布朝廷恤商裕民至意特諭

康熙四年三月初五日奉

恩詔一直省順治十六十七十八年催徵不得各項舊欠錢糧  
著照蠲免十五年以前錢糧一體蠲免前侵盜庫銀不赦今  
俱著並免其鹽課積逋催徵不得者著察明亦准酌量蠲免  
特諭

康熙九年十一月巡鹽御史席特納徐旭齡等請停預徵  
一疏戶部議覆未便更改奉

旨據席特納等奏稱預徵原非舊例官收一金商費數金早徵  
於額不增遲徵於額不減民間地丁正賦尙禁預徵商民徵  
納法無二視等語爾部遠議不便更改是否相合著再確議  
具奏欽此

互見  
惟商

謹按嗣經戶部再議覆准停止預徵

康熙十七年三月十二日吏部戶部兵部奉

上諭朕統御寰區孜孜圖治期於朝野乂安民生樂業共享昇平乃副朕宵旰勵精之意不意逆賊吳三桂背恩扇亂各處用兵禁旅征剿供應浩繁念及百姓困苦不忍加派科斂因允諸臣節次條奏如裁減驛站官俸工食及存留各項錢糧改折漕白二糧顏料各物增添鹽課鹽丁房田稅契牙行雜稅官戶田地錢糧奏銷浮冒隱漏田畝嚴行定例處分用過軍需未經報部不准銷算以上新定各例不無過嚴但爲籌畫軍需早滅逆賊以安百姓之故事平之日自有裁酌各省

督撫提鎮大小文武等官俱宜上體朕意下念民生潔己奉公愛惜物力務期早奏蕩平與民休息以稱朕乂安海宇至意特諭

康熙二十年冬奉

恩詔將十七年戶科余國柱請加淮南北綱食鹽閏課十三萬九千三百七十四兩七錢零十八年御史郝浴所增甯國和含食鹽五萬六千引引壅課重俱行優免特諭

康熙二十年十二月二十日奉

恩詔一康熙十七年各行鹽地方徵收閏月課銀除已完外如有拖欠者該巡鹽御史保題到日豁免此後閏月停其徵收

特諭

康熙二十六年五月奉

旨康熙十三年以後加增各項稅銀查明豁免欽此

康熙三十三年十二月二十日戶部等題請各關鹽差額徵餘贖數目酌量加增作爲正數以充兵餉二十一日奉

旨依議這加增銀兩俱出於該差官員所私得贏餘之數不得借端於定額外多徵貽累商民欽此

康熙三十七年四月奉

旨將三十六年加斤之鹽暫行停止所停鹽課自三十六年爲



始分作五年帶徵至四十年爲止嗣後停徵欽此

康熙三十八年五月戶部禮部奉

上諭朕子育黎元勤求治理日孜孜以施德澤厚民生爲急務而江浙二省尤東南要地朕時軫念比歲以來蠲豁田賦賑濟凶荒有請必行無災不恤雖漕項錢糧向未蠲免者亦曾經特旨蠲免愛養之道備極周詳庶幾民生日益康阜用是乘輿時邁於視河事竣巡歷江浙諮訪民間情形見淮揚一路旣困潦災而他所過州縣察其耕穫之盈虛市廛之贏細視十年以前實爲不及此皆由地方有司奉行不善不能使實惠及民所以小民雖懷愛戴之誠而朝廷恩澤卒未下究

朕目擊屢懷亟思拯卹截留漕糧寬免積欠已另諭旨惟各鹽差關差向因軍需繁費於正額外令在差官員以所私得贏餘交納充用念各官孰肯自捐私橐勢必仍行苛取商瘠民困均坐此弊著將加增銀兩一概停罷以紓商民之累其兩淮鹽課康熙十六年曾加增四十萬兩今恐商人辦課維艱漸至匱乏著減去二十萬兩此外有應行應革事宜朕還都以後仍加商榷次第舉行該督撫藩臬皆地方大吏亦著悉心體訪凡有可爲民興利除害者作速勘實陳奏嚴革雜派禁止刁訟然後胥吏不能作奸良民得以安業儻官吏有悖旨妄行者許商民首告該督撫察出卽行參奏朕視民如

傷惟恐一夫不獲其所茲值海宇昇平兵革不事正當與民  
休息之時故特渙沛德音減徵寬稅以爲閭閻留有餘之力  
萬一嗣後別有急需或不得已而稍議加增想在小民亦能  
共諒朕懷輸將之恐後也至於江南浙江人文稱盛入學名  
數前已酌定增額今著於府學大學小學各增五名舉行一  
次以示獎勵人才至意爾二部卽遵諭行特諭

雍正元年正月吏部奉

上諭原任兩江總督常爾劾奏兩淮巡鹽御史張應詔科派加  
根銀兩經工部尙書李先復等審明覆奏爾部駁詰以爲加  
根銀兩去年眾商旣已供爲張應詔所派今常爾身故眾商

遂改前供所審未爲允協朕聞常爾居官本無令名

皇考亦曾向朕言之其所奏豈可爲准

皇考當日不肯據常爾所奏定案故遣大臣前往審察今既已  
審明不必再行駁詰況張應詔本無科派之事眞實難掩眾  
商安得不改易前供乎至於商人欲以此項銀兩充饒朕豈  
需此其已交十三萬餘兩准其抵算往年商欠其未完銀二  
十餘萬兩著盡行豁免我

皇考恤商愛民若辦理此事亦必如此歸結也至於眾商历年  
所欠正額關係國帑應作何年限徵收之法爾部確議具奏  
特諭

雍正二年九月巡鹽御史噶爾泰題明海潮暴發各場被災借支運庫銀一萬五千兩分別賑救併請將折價錢糧分年帶徵奉

旨據奏七月內海潮衝決范隄沿海二十九場溺死竈丁男婦四萬九千餘名口鹽池草蕩盡被漂沒朕心憫惻如同執熱著卽動鹽庫銀三萬兩委員分頭賑恤務使得所不必該御史捐補其未完折價錢糧四萬餘兩悉行蠲免毋得仍稱帶徵名色致累見在窮丁該部遵旨速行至淮商運行鹽斤恐竈丁一時未能煎辦應作何接濟民食該部作速確議具奏欽此

雍正四年正月戶部奉

上諭據兩淮巡鹽御史噶爾泰奏稱眾商感戴保育生全賑恤  
蠲免之恩今鹽豐課裕商業日隆情願公捐銀二十四萬兩  
備交運庫又噶爾泰名下有應得銀八萬兩亦願報部撥解  
等語從前兩淮鹽課虧欠甚多自噶爾泰辦理以來歷年商  
欠正項錢糧及贏餘銀兩俱一一完納恤商裕課鹽政肅清  
甚屬可嘉朕前曾降諭旨令江南督撫酌議積穀備用今眾  
商公捐及噶爾泰奏請解部之項共計三十二萬兩著將二  
萬兩賞給噶爾泰其三十萬兩可卽爲江南買貯米穀蓋造  
倉廩之用所蓋倉廩賜名鹽義倉卽著噶爾泰交與商人經

理如此則於地方積貯甚爲有益而眾商公捐之項亦得實濟著議政大臣大學士九卿詳議具奏噶爾泰著該部從優議敘其急公眾商行令噶爾泰分別造冊報部亦著議敘以示鼓勵欽此

雍正四年二月議政大臣等議覆建倉貯穀及選商管理事宜奉

旨依議此係商人急公銀兩卽於本地買貯米穀備用商人等自然盡心管理不致虧缺儻將來有不得已虧缺之處朕必察情寬宥欽此

雍正五年正月噶爾泰奏淮南商人黃光德等願公捐銀

二十四萬兩以充公用奉

旨朕軫恤眾商是以減除浮費加添鹽斤種種施恩之處無非欲使眾商均霑利益資本饒裕並不計其感激報效也伊等上年公捐銀兩朕因其既已捐出難於退還故令卽於本地方建立鹽義倉以裕積貯備地方之用今伊等又復公捐大非朕意但據噶爾泰所奏眾商情辭懇切著將此項銀兩令眾商各暫行存貯將來遇有公事動用之處再候諭旨或將此項任伊等資生利息亦從其便向後不必再捐又據噶爾泰奏稱眾商備伊公務銀八萬兩今一併交庫等語此係噶爾泰應得之項若有需用之處聽其自行支用伊若不接受



任其退還眾商朕不收受聞得煎鹽竈戶皆居住濱海之地  
離城最遠一遇歉收之歲覓食維艱若遠赴鹽義倉領收米  
石恐窮民多往返之勞朕意應計地之遠近人之多寡酌立  
數倉於近竈之地積貯米穀以備貧苦竈戶一時緩急之資  
令誠實商人經管其事若遇歉歲卽以此爲賑貸之資濟其  
困乏著噶爾泰悉心經理卽於乙巳綱商人公捐銀兩內酌  
量動用若干以爲建倉積穀之費並遴選商人管理務期實  
有裨益欽此

雍正十三年七月鹽政高斌奏泰分司所轄十場止有泰  
州倉廩一座通分司所轄十場止有通州如皋倉廩兩

座請於東臺石港二處各建倉一座每倉分儲穀一萬石阜甯縣建倉一座分儲穀五千石如此則濱海各場可以就近接濟奉

旨極好之事但貯穀一萬之多凡錢糧倉庫必應建官兵住居之處有城垣守禦之所方是若因竈丁免跋涉數程之便取快一時恐非遠大之策可與督撫斟酌詳議辦理欽此

謹按嗣於十一月高斌會同總督趙宏恩巡撫高其倬覆奏東臺石港兩場原設土城雖因年久坍塌見有文武職官駐劄兵丁巡防人煙稠密可以建倉請

照前奏辦理

雍正十二年十一月總理事務王大臣奉

上諭朕卽位之初加恩海內民人已降旨將雍正十二年以前各省民欠錢糧悉行蠲免俾閭閻無催科之擾因查兩淮鹽場竈戶應徵折價錢糧亦有未完之項當與民人一體加恩者著該部卽速傳諭總督趙宏恩鹽政高斌將雍正十二年以前舊欠若干一一查明照地丁錢糧例奏聞蠲免俾竈戶均霑實惠毋使胥吏滋弊中飽欽此

雍正十三年十一月總理事務王大臣奉

上諭兩淮商人向蒙

皇考深仁體恤有加無已十餘年來商力寬裕伊等咸知感激

新舊正額帶徵各項俱能急公完納朕臨御以來時時仰體  
皇考深求民瘼之盛心早夜咨詢凡有關於民生日用者竭慮  
殫思務期至當商眾卽吾民也朕心豈有歧視淮南鹽政課  
額甲於天下兩江三楚延袤七八千里皆仰給於淮鹽課源  
用以饒裕近聞湖北早禾收成稍歉鹽未暢銷楚地素爲魚  
米之鄉湖魚旺產亦號豐收商得資其醃切藉以完課今年  
漢水漲發魚市稀少又湖北因經理貴州苗疆軍務未暇轉  
運以致漢口鹽壅未銷積至七八百萬包是乙卯綱正額未  
能當年報銷而明年乾隆元年丙辰綱又應按年起運兩年  
並納商力維艱朕心深爲軫念用是詳爲區畫籌度變通將

乙卯綱未完正額提出分年帶徵自乾隆元年丙辰綱起按年接運則商力既紓完納自無遲誤其帶徵之處俟見在各項帶徵完納之後分年起限其乙卯綱內應帶運口岸之鹽免其帶運俾得易於疏銷至丙辰綱課額既將乙卯綱提出之後若仍於九月奏銷則新頒引鹽甫到口岸課源尙難接濟著展限至乾隆二年二月奏銷從此年清年額可永無遲壓之虞著該督趙宏恩該鹽政高斌實力奉行務令諸弊盡革實惠均霑以示朕優恤商民之至意欽此

雍正十三年十二月總理事務王大臣奉

上諭朕前聞淮分司所屬廟灣新興臨興白駒劉莊伍祐等六

場今歲秋成歉薄恐竈戶煎丁有貧苦乏食者已曾於高斌奏事摺內諭令加意賑恤毋令失所今思冬春寒冷之際及明歲青黃不接之時貧竈餬口維艱不得不豫爲籌畫著該鹽政高斌會同總督趙宏恩將乏食竈戶煎丁遵照民賑之例一體加恩務令均霑實惠不許胥役地棍等侵蝕中飽欽此

乾隆元年正月二十日總理事務王大臣奉

上諭私鹽之禁所以除蠹課害民之弊大夥私梟每爲盜賊通藪務宜嚴加緝究然恐其輾轉株連故律載私鹽事發止理人鹽並獲其餘獲人不獲鹽獲鹽不獲人者概勿追坐至於

失業窮黎肩挑背負者易米度日不上四十斤者本不在查禁之內蓋國家於裕商足課之中而卽以寓除奸愛民之道德意如此其周也乃近見地方官辦理私鹽案件每不問人鹽曾否並獲亦不問販鹽斤數多寡一經捕役汎兵指拏輒根追嚴究以致挾怨誣攀畏刑逼認干累多人至官捕業已繁多而商人又添私雇之鹽捕水路又添巡鹽之船隻州縣毘連之界四路密布此種無賴之徒藐法生事何所不爲凡遇奸商夾帶大梟私販公然受賄縱放而窮民擔負無幾輒行拘執或鄉民買食鹽一二十斤者並以售私拏獲有司卽具文通詳照擬杖徒又因此互相攀染牽連貽害此弊直省

皆然而江浙尤甚朕深爲憫惻著各省督撫嚴飭各府州縣文武官弁督率差捕實拏奸商大梟勿令疏縱其有愚民販私四十斤以上被獲者照例速結不得拖累平人至貧窮老少男婦挑負四十斤以內者概不許禁捕所有商人私雇鹽捕及巡鹽船隻幫捕汛兵俱嚴查停止欽此

乾隆元年二月初九日內閣奉

上諭江南佐雜等向來未議養廉該省事務繁多差遣絡繹倍於他省微員俸少力薄未免衣食艱難查江蘇有不充饗之鹽規銀兩安徽司庫有存公耗羨銀兩著總督趙宏恩巡撫顧琮趙國麟公同查覈仿照江西湖廣之例酌定數目每年



賞給以爲養廉示朕體恤微員之至意欽此

乾隆元年七月初四日內閣奉

上諭兩淮鹽務內有從前江廣口岸匣費收受人員數目及甲乙兩綱上下兩江各官收受規禮銀兩歷年既久人多物故前據督臣趙宏恩等題請免追比經戶部議令造冊送部覆奪朕思此項陋規餽送皆在昔年未定養廉之前今事隔多年授受之人又多陞遷物故不但銀兩難追卽造冊亦無確據不足憑信徒滋地方之紛擾著加恩悉行寬免並免其造冊送部欽此

乾隆元年七月初四日大學士奉

上諭從來經理鹽政以緝私爲要蓋緝私所以懲奸懲奸所以安民故必使梟徒斂迹而民間毫無擾累方不負國家立法之本意也江南鎮江瓜州一帶爲淮浙引鹽毗連之地惟恐淮鹽過江故巡查最爲嚴緊近聞督撫提鎮等俱疊檄該地方文武官弁督率兵役各路緝捕而江浙督提等又專差武職帶兵會同文員查拏此在懲治巨梟之道固應如是俱兵役四出豈能保其盡皆守法奉公儻約束稍有不嚴稽查稍有未到或借端生釁或恐嚇鄉愚或賄縱巨奸而株連良善或指使詐騙而貽害富民大有關於地方民生不可不防微杜漸也爾可密寄信與總督趙宏恩大學士稽曾筠令其留

心體察切加約束務使官弁兵役實力奉行不得生事滋擾  
並飭巡查各員隨地隨時宣朕惠養萬民之意俾愚頑改惡  
良善安居並令趙宏恩等將朕此旨密諭蘇州巡撫及該管  
提鎮等一體遵行特諭

乾隆元年十一月二十三日總理事務王大臣奉

上諭朕查兩淮鹽法從前浮費繁多商力日困欽奉

皇考諭旨徹底清查革除浮費覈定應留之項以備地方公用  
乃原任鹽臣噶爾泰於酌定存公之外又以商人具呈餽送  
鹽政銀八萬兩名曰公務餽送運司銀四萬兩名曰薪水奏  
請歸公蒙

皇考批諭此係噶爾泰等應得之項若有需用之處聽其自行支用伊若不用卽退還眾商不必歸公噶爾泰又奏稱眾商力量寬裕此項實出情願又奉

皇考諭旨俟有地方公事將此應用是

皇考聖意不肯令其歸公諭旨甚爲明切後據噶爾泰經手辦理雖每年按綱具奏而其實商人未能照數完繳丙午丁未兩綱未完銀十二萬三千餘兩商人具呈分作六年帶徵經部議准行在案至己酉庚戌未完銀兩曾經鹽臣題請寬免部議未允朕卽位以來仰體

皇考愛養商民之心屢加優恤務使商力寬餘以受國家恩澤

此項公務薪水銀兩既在額課之外著永行停止以惠商民至從前已庚兩綱未完公務薪水之項歷年已久著悉行豁免該督該鹽政可卽宣朕諭旨俾眾商共知之欽此

互見恤商

乾隆元年十二月總理事務王大臣奉

上諭朕聞淮南引鹽自鹽場捆重由淮揚一帶河路運至儀所掣摯方赴江廣口岸分銷今淮揚運河於來歲糧船回空後築壩挑濬約計半年之期鹽船不能行走民食所關必須先事綢繆預爲捆重運至儀所以便源源運往口岸免致缺乏按月計額計得預運鹽七十萬引但商人行鹽原係陸續完課以次轉輸今既預運七十萬之引鹽卽須早完七十萬引

之正雜錢糧商力未免竭蹶查鹽務正雜錢糧商人向分三次完納首先完銀謂之請單其次完銀謂之呈綱最後完銀謂之加斤此舊例也今朕寬緩其期將此預運之引鹽所有請單呈綱兩次應納錢糧准於加斤時一併完納俾商力寬舒得以從容辦課至淮北引鹽亦由運河經過所有預運鹽斤十萬餘引亦照此例行著該鹽政遵照諭旨辦理並通行曉諭眾商知之欽此

乾隆二年二月兩江總督趙宏恩鹽政尹會一奏本省遇有歉收賑恤各於本邑常平倉動用鹽義倉相距路遠近年未經撥用儲穀最多無可改撥請於揚州倉酌存

穀八萬石泰州倉酌存穀六萬石尙餘米穀四十萬餘石請以撥補本省上年被水州縣動賑倉穀以省買補之費並於附近標鎮協營量其額兵多寡酌撥分儲春借秋還免其加息奉

旨如此通融辦理頗是但揚泰二處六萬八萬之數可以不必拘定譬如今日之可以通融非前此多貯之益歟但不可使之陳陳相因終於霉變可耳再與慶復商酌辦理欽此

乾隆二年四月初二日奉

上諭前因淮揚運河築壩挑濬計需半年之期兩淮引鹽應預行捆運所有預運鹽斤請單呈綱應納錢糧恐商力不無竭

蹶已降諭旨令緩至加斤時一併完納今朕思商人資本盈絀不同而預運與正運一齊趕辦仍不免有竭蹶之處著將淮南丁巳綱正運引鹽未築壩以前運到儀所過掣者其應納請單呈綱錢糧各先完納一半餘聽陸續完納總限奏銷之時全數通完俾商人更得通融辦理欽此

乾隆二年十一月十五日奉

上諭前據兩江總督慶復奏稱兩淮鹽義倉米穀揚州存十二萬石泰州存六萬石其餘三十六萬石分派上下江通融撥補此項穀石因今冬挑濬運河民食維艱仍運赴淮平糶將糶出價銀分派上下兩江等語朕已降旨允行今據兩淮巡



鹽御史三保奏稱淮商連名具呈懇請減價並將額存揚倉之十二萬石一併發糶儻十二萬石之內將來買補不敷商等情願公捐補足等語朕思義倉積貯原以惠濟貧民今大工興舉河道不通時值隆冬小民生計艱難傭工夫役需體塗足俱堪憫惜見今平糶之米每升制錢七文較之市價已為平減今再格外施恩每升減錢二文以五文一升計算每石僅糶銀六錢有零於小民實有裨益俟糶完之後將糶出價銀分解上下兩江如此項穀石不敷糶賣即將揚倉之十二萬石一併平糶此十二萬石之內將來買補缺額眾商既稱情願捐補伊等從桑梓起見補實倉庾以濟民食著照所

請行但不必過於急遽其應如何徐徐辦理之處著那蘇圖  
三保議奏至於平糶之事在揚城者著三保會同知府辦理  
其山陽高寶江甘等州縣著該地方官辦理仍著總督那蘇  
圖巡撫楊永斌不時查察務使小民均霑實惠欽此

旨上元等四縣既有偏災且帶運乙卯一分之鹽又辦納辛酉  
新綱之課商力未免拮据著照準泰所請將辛酉綱課額本  
年先完二分外其餘自壬戌年起每年帶徵一分以示朕優  
恤商人之意欽此

乾隆八年四月初三日內閣奉

上諭朕從前降旨將江省清河等十二州縣衛所有乾隆五年以前未完帶徵銀兩統行停緩俟各處年歲屢豐民間元氣漸復之後該督撫再行酌量定限分年帶徵所以紓民力恤困乏也茲又念山陽阜甯鹽城甘泉興化泰州高郵寶應淮安大河揚州等十一州縣衛上年被災亦重豐縣碭山贛榆三縣災雖稍輕而均係連年被水之地民力甚屬拮据所有十四州縣衛乾隆五年以前未完丁地漕項銀米著照清河等十二州縣衛一體停緩并將清河等十二州縣衛及山陽等十四州縣衛乾隆六年帶徵丁地漕項銀兩同五年以前

未完之項一體停緩俟年歲屢豐之後該督撫再行酌量奏聞分年帶徵又淮安分司所屬板浦徐濱中正莞濱臨洪興莊等六鹽場所存乾隆二三四等年未完帶徵折價銀一萬六千三百六十餘兩該督撫等因係鹽場名目未曾歸入停緩之內朕思海濱竈戶輸納折價錢糧與民人無異屢遭水患之餘元氣未復今屆麥熟啟徵若令新舊錢糧一時並納未免艱難著與民戶一例停緩以示朕優恤民竈之至意欽此

乾隆八年五月初二日內閣奉

上諭江南淮徐等處從前疊被水災淮安分司所屬板浦徐濱

中正莞瀆臨洪興莊等六鹽場所所有乾隆二三四等年未完帶徵折價銀兩朕已降旨令與民戶一例停緩俟屢豐之後再行分年帶徵今聞泰州分司所屬鹽場亦皆坐落阜甯鹽城興化泰州等處所有廟灣富安安豐東臺何垛梁垛丁溪草堰劉莊伍祐新興等十一場上下被災亦重竈戶力量艱難其未完乾隆二三五六年帶徵折價銀通計一萬六千六百七十二兩零應與淮安分司所屬板浦等場一例停緩其淮安分司所屬板浦等六鹽場尙有乾隆六年被災帶徵未完銀四千一百一十餘兩彼地民戶未完六年分丁地漕項朕既已降旨停緩此項未完折價錢糧亦准照民戶一例

停緩該部卽遵諭行欽此

乾隆九年三月內閣奉

上諭上年江南淮徐所屬歉收之州縣朕已諭令該督撫悉心體察撫綏安輯不使窮黎失所但聞海州贛榆二州縣地瘠民貧又當積歉之後其艱窘之狀較之他處爲甚計賑濟之期正二月便當停止此時去麥熟尙遠民食艱難朕心軫念著於原議之外將極貧者加賑四十日次貧者加賑三十日以恤窮困又聞鹽城銅山沐陽三縣其情形較海贛爲輕而較他處則稍重停賑之後亦應量爲籌濟著該督撫商酌速辦欽此

兩淮鹽法司  
乾隆十年十月十一日內閣奉

上諭淮揚之串場等河今年冬底築壩挑濬鹽舟不能行走其丙寅新綱引鹽應預先趕運四十萬引各商既有額辦之引又有趕運之鹽一時完課未免竭蹶著加恩將預運新鹽其請單呈綱兩次應納錢糧俱緩至加斤時一併完納再該商等預運鹽斤堆積垣所不無滷耗著照乾隆二年之例凡本年十二月三十日以前所到新鹽每引加耗二十斤俾商力得以紓徐欽此

乾隆十一年四月二十日內閣奉

上諭向來江西省每逢編審之年丁男之外又有婦女蓋緣從

前有鹽鈔一項分給小戶計口納鈔卽有婦女應徵之項則不得不稽其存亡增減是以入於編審之內也今食鹽課鈔久經攤入地糧而該省尙循舊例辦理朕思從前照鹽納價編審尙屬有名今鹽鈔旣已攤入地糧之內則是婦女已無可徵之項何必存此編審虛名徒滋擾累嗣後編審婦女之處著行停止欽此

乾隆十一年八月二十五日內閣奉

上諭江南海州及沐陽贛榆二縣頻年被水小民生計艱難其應徵地漕銀米已降旨停緩俟屢豐之後再行分年帶徵惟是積歉之區朕心屢念今歲復遭水患將來卽遇豐收新糧



內州縣志 卷六  
三  
舊賦並徵民力仍不免於拮据著將海州及沐陽贛榆二縣  
乾隆十年以前積欠地漕銀米概行豁免其淮安分司所屬  
坐落海贛二州縣之板浦徐濱中正莞濱臨洪興莊等六鹽  
場乾隆十年以前未完折價帶徵銀兩亦一體豁免俾瀕海  
災黎得霑實惠以紓積困欽此

乾隆十一年十二月二十六日內閣奉

上諭江南淮徐海等屬災民朕已特沛恩膏令地方官妥協辦  
理其鹽竈尙不在加賑之內但思各場多坐落被災州縣雖  
與民戶所業不同亦當一體加恩以示優恤酌將被災九分  
之莞濱場竈戶無分極貧次貧概行加展兩月被災八分之

板浦徐瀆中正臨洪興莊五場竈戶無分極貧次貧加展一月俾得接濟有資以紓竈力該部卽遵諭行欽此

乾隆十二年正月初八日內閣奉

上諭江南海州沐陽贛榆等處積欠帶徵銀兩已經特恩豁免其隨正耗羨例應仍舊徵輸但念該地方積歉之餘元氣未復若仍追節年零星耗羨民力未免拮据著將海州及沐陽贛榆二縣並坐落海贛二州縣之板浦徐瀆中正莞瀆臨洪興莊等六鹽場乾隆十年以前民竈舊欠所有應徵耗羨通行豁免以惠災黎欽此

乾隆十二年十一月奉

上諭今歲七月江南地方猝被潮災朕心深爲軫念屢降諭旨令該督撫加意賑恤惟是賑濟月分至冬底已滿離來春麥熟尙遙恐窮黎仍不免嗷待之虞著將蘇松太所屬被災最重之崇明極次貧民再加展三月次重之鎮陽寶山太倉上海及南匯之浙鹽場極次貧民竈俱加展兩月又次之常熟昭文極次貧民竈俱加展一月其淮北所屬被水成災雖較江以南稍次但係積歉之區其災重之海州沭陽邳州宿遷睢甯銅山沛縣安東桃源九州縣內被災九十分者極次貧民俱加展兩月被災七八分者極次貧民俱加展一月其兩淮鹽場竈戶亦著一體加恩被災十分之莞瀆九分之板浦

徐瀆中正臨洪興莊七分之伍佑極次貧民俱加展兩月六分之二新興極貧加展一月次貧同五分之劉莊廟灣極次貧民俱加賑一月至衛軍貧生以及寄居場地之民戶各隨坐落地方分別照例辦理俾得有資接濟該部遵諭速行欽此

乾隆十二年十一月大學士伯張廷玉等議覆鹽政吉慶奏請撥鹽義倉穀十五萬石分發各場減價平糶一摺查平糶定例豐年按市價酌減五分歉收之年酌減一錢奉

旨若荒歉之歲穀價甚昂止照例減價一錢則窮民得米仍屬艱難不能大沾恩澤嗣後著該督撫臨時酌量情形將應減

若干之處預行奏聞欽此

乾隆十三年二月二十日內閣奉

上諭兩淮鹽政吉慶奏稱兩淮綱食引鹽近因蒲草歉產包索減輕鹽斤易致虧折仰請量予加增俟蒲草廣產奏聞停止等語近年淮商急公輸課頗爲踴躍今吉慶既有此奏著加恩於引額之外每引增給十斤俾商本不致虧折民食永資利益欽此

乾隆十四年二月十三日內閣奉

上諭據長蘆鹽政麗柱奏稱大軍凱旋一切善後事宜官兵糧餉等項在在需用請照康熙十四年之例蘆東每引增銀五

分並請敕令兩淮兩廣河東浙江等省一體按引增課等語  
此奏殊屬猥瑣鄙陋金川用兵供億固爲浩穰但國家當全  
盛之時無論已經降旨班師卽尙在進兵公帑所儲儘足敷  
數年之用且康熙十四年加增鹽課原因三孽煽動兵連數  
省正供缺乏不得已而爲之旋卽復舊今時勢懸殊豈可援  
以爲例至山西浙淮商民捐輸旣屬伊等感沐頻年蠲免恩  
膏願出餘資少裨餽運而按例議敘又蒙優典初非勒派科  
斂強以必從也昨有唐綬祖倡捐養廉之奏朕已降旨申飭  
今麗柱復以增課爲請競思懸擬此風斷不可長著交部察

議欽此

互見  
恤商

乾隆十五年八月二十六日奉

上諭朕明春巡幸江浙淮揚河路運鹽船隻未便絡繹往來見據兩淮鹽政吉慶奏請於本年十月將鹽斤預運四十萬引以資接濟朕思該商等先期趕辦一切起駁掣貯無不耗費著加恩將本年冬季所運之辛未綱鹽准其每引加耗二十斤俾商力充裕自與江廣民食有益該部卽行文該鹽政知之欽此

乾隆十六年二月初九日奉

上諭朕巡幸江南兩淮商人踴躍急公捐輸報效地方官一應公務俱於此取給可信其無絲毫擾累閭閻而辦理工程貧

民更得資其利賴於生計轉有裨益甚屬可嘉著加恩各按其本身職銜加頂戴一級以示朕恤商爲民至意欽此

乾隆十六年二月奉

上諭兩淮竈欠自乾隆二年至十四年因災停緩帶徵折價銀四萬二千二百九十一兩六錢七分五釐與民賦積欠一體豁免欽此

乾隆十六年二月十六日內閣奉

上諭朕省方所至廣沛恩膏前因兩淮商眾踴躍急公業已加恩優獎更念其運綱輸課接濟民食恤商斯足以惠民特行再布殊恩著將兩淮綱鹽食鹽於定額外每引賞加一十斤



不在原定成本之內俾得永遠霑受實惠商人當仰體朕博  
愛敦本至意風俗雖不必驟更近一分返樸之心卽遠一分  
極奢之念殖息無取其三倍減一分售鹽之價卽利一分食  
鹽之人其有昂值罔利致累閭閻則深負加恩德意矣該鹽  
政其通示商眾知之欽此

互見  
恤商

乾隆十六年十月三十日奉

上諭吉慶奏稱兩淮各場煎丁本屬窮民專以煎曬鹽斤爲業  
每因鹽斤不能接濟向各竈戶重利借貸以資日用生計甚  
爲拮据等語著該鹽政酌量於公項內動銀數萬兩准其赴  
官借領每年春借冬還不必加息俾海濱窮民咸霑實惠欽

此

乾隆十八年秋通泰淮三屬被水兩淮商人情願捐銀三十萬兩以備賑濟經鹽政普福具奏奉

旨見在淮揚等處被水成災朕心軫念所有商人捐項卽著增備淮揚賑濟之需欽此

乾隆十八年十二月初六日奉

上諭普福奏續勘被水情形據稱安豐富安梁埭東臺等四場成災六分何埭丁溪二場低窪之處成災六分小海草埭劉莊伍祐新興等五場七分先報成災八分之廟灣一場增至十分以上富安十一場被災六七分請照例分別賑給至廟

灣一場已經賑過兩月一月者請再增賑兩月各場應徵折價及借欠未完等項分析蠲緩所需賑恤銀穀在於鹽義倉及本年商捐項下動支等語吉慶此時已經抵任會同鄂容安莊有恭查明妥協辦理務使場竈被災各戶均霑實惠毋遺毋濫以慰朕懷欽此

乾隆十九年九月十一日奉

上諭吉慶奏通分司所屬角斜耕茶豐利等場竈地於八月初一日偶被風潮草房間有倒塌人口間有損傷已照例撫恤並給修費棺殮等語煎丁猝被水災情堪憫惻若僅按例撫恤一月口糧未免拮据著查明各場被淹處所無力煎丁於

九月內再行加賑一月口糧以示軫恤欽此

乾隆二十年七月奉

上諭江南上年被災地方俱已加恩展賑鹽屬場竈坐落各州縣情形與地方貧民無異自應一體加恩著將淮屬被災十分九分之板浦徐瀆中正莞瀆臨洪興莊六場泰屬被災八分之廟灣一場被災六分之丁溪小海草堰劉莊伍佑新興六場並未成災之南五場分別極貧次貧應展賑者照例按月展賑應給口糧者俟秋收徵還所有賑糧銀米兼支及賑銀加增之數俱著照地方災民之例一體辦理該督撫鹽政督率所屬實力奉行務令災丁溥霑實惠欽此

乾隆二十年九月內閣奉

上諭盧見曾奏本年七月淮屬被水房舍坍塌倒秋禾淹漫各情形竈丁猝被潮災深堪軫念著卽速查明乏食窮丁先行撫恤一月口糧所有修葺殮埋之費速行查明動給毋致稍有失所其本年竈戶應徵錢糧並著分別蠲緩極貧戶口再行加賑該督撫鹽政率屬實力辦理務俾均霑實惠至通屬之石港等十場及秦屬之富安等南五場雖被水較輕而值此風潮竈戶未免拮据其無力窮丁並著一體賞給一月口糧新舊欠項概緩至來年徵收以紓丁力欽此

乾隆二十一年閏九月二十四日奉

上諭兩淮鹽政普福奏稱明春南巡所有淮揚一帶運鹽船隻於今年十月內令該商等先期預運四十餘萬引堆積儀所以資來年江廣食用等語此項鹽斤先期預運堆貯不無瀦耗著加恩照十六年之例每引加耗二十斤以裕民食以紓商力欽此

互見  
恤商

乾隆二十二年二月初二日奉

上諭朕幸蒞江淮宏敷愷澤而兩淮眾商皆未登仕版之人其承辦差務踴躍急公宜沛特恩以示獎勵伊等本身原有職銜如已至三品者俱著賞給奉宸苑卿銜其未至三品者俱各加頂帶一級欽此

互見  
恤商

乾隆二十二年二月初三日奉

上諭兩淮辦差商眾見已加恩優敘更念該商等銷引辦課歲額通完而於地方公事更樂輸恐後卽如前歲江省災務在國家之撫恤雖已逾數十萬而淮場煮賑半出商捐其桑梓任恤之意深可嘉予著再加恩自丁丑綱爲始綱鹽食鹽每引加賞十斤不在原定成本之內以二年爲限庶民力旣足而商力亦紓以示恤商愛民之意欽此

互見  
恤商

乾隆二十二年二月初五日內閣奉

上諭朕清蹕時巡勤求民隱而兩淮竈戶僻處海濱生計勞苦尤堪軫恤所有乾隆七十八十九等年停緩帶徵竈欠未

完折價銀三萬八千餘兩著加恩一體豁免以普惠澤欽此  
乾隆二十二年八月十四日內閣奉

上諭普福奏兩淮鹽場於七月初三等日偶被風雨亭場淹漬  
等語淮海二屬各場連年被水今秋又復淹漬雖見經照例  
借資撫恤不致失所但被浸亭場車戽需時有妨煎曬竈丁  
未免拮据著加恩將兩淮竈戶積年因災借欠口糧籽種等  
項未完銀兩概行豁免以示軫恤窮丁至意欽此

乾隆二十三年三月奉

上諭兩淮引鹽壅積今年戊寅綱又須請領引目按課輸銷商  
本不能轉運情形拮据著加恩將戊寅一綱提出停其捆運



以便輪銷積引所有應徵額課分作十年帶徵從此年清年額則引鹽既無遞壓之虞而各商轉輸亦得寬裕儻將來積引疏銷或有不敷行運之處該鹽政酌量情形照前請領餘引以資接濟欽此

乾隆二十三年五月十一日奉

上諭據嵇璜奏稱芒稻一閘爲諸湖入江之路宜洩通暢下河州縣自可永免水患等語芒稻一閘乃歸江第一尾閘向因淮南鹽艘皆由灣頭河轉運必須芒稻閘門下板方可蓄水過行以致不能啟放合宜前據該督等奏閘東有舊越河一道應令鹽船由越河直走金灣北閘是洩水與運鹽已自分

爲兩途芒稻閘自可常年啟放矣但終恐狃於蓄水運鹽之習仍不免因循觀望夫蓄水運鹽不過少省牽輓之勞所費在富厚商人而下河數州縣之民生攸繫此其輕重豈不較然耶嗣後芒稻閘應永遠不許再下閘板俾暢洩歸江則諸湖積水自可減退遇伏秋大汛亦足以資容納而下河一帶得永蒙樂利之休矣該督等將此旨勒石閘畔俾後來知所遵守焉欽此

乾隆二十三年十一月鹽政高恆奏據商人黃源德等呈稱願公捐銀一百萬兩請先於運庫撥解分五年帶完是月二十日奉

上諭明歲巡幸江浙一應錫賚俱經各衙門照例動用正項預備第該商等素稱踴躍急公今既抒誠籲懇情辭肫切著於此內撥銀三十萬兩交與尹繼善辦理差務卽賞給兩淮二十萬兩爲伊等修理行宮等項之需酌留十萬兩以備賞賜其餘四十萬兩著解交河南巡撫胡寶瑤備充工程賑恤之用該商等並著交部議敘以示嘉獎欽此

乾隆二十四年十二月十七日內閣奉

上諭本年江蘇通泰淮三分司所屬之丁溪小海草堰劉莊伍祐新興廟灣等七場應納折價著照被災十分之例蠲免十分之七其蠲贖錢糧分作三年帶徵至泰屬南五場通屬十

場淮屬三場被災較輕之處亦著將應徵之項分作二年帶徵以示體恤欽此

乾隆二十六年奉

上諭直省塌沒田地人戶逃亡其虛糧仍相沿追納者該地方官查明咨部奏請豁免欽此

謹按嗣於三十年鹽政高恆咨據豐利場三十總應納折價正課銀六十四兩二錢該地當黃沙洋海口之衝久被塌沒各竈逃亡所有見存之戶於本身賠納虛糧之外更帶此項亟請豁免部議允之

乾隆二十七年二月十四日奉

上諭朕此次南巡所有兩淮商眾承辦差務宜沛特恩以示獎勵其已加奉宸苑卿銜之黃履暹洪徵治江春吳禧祖各加一級已加按察使銜之徐士業汪立德王勛俱著加奉宸苑卿銜李志勳汪秉德畢本恕汪燾著各加按察使銜程徵榮著賞給六品職銜程揚宗程均吳由玉汪長馨俱著各加一級欽此

乾隆二十七年二月十四日奉

上諭兩淮商眾見已加恩優敘更念該商銷引辦課歲額通完而於承辦差務尤爲踴躍急公深堪嘉予著再加恩自壬午綱爲始綱鹽食鹽每引加賞十斤不在原定成本之內以二

年爲限庶民食旣足而商力亦紓用示恤商愛民之意欽此

互見  
恤商

乾隆二十七年二月十四日奉

上諭朕此次南巡省方問俗翠華所過慶典時行念兩淮竈戶僻處海濱生計殊爲艱苦所有從前帶徵未完折價銀九千餘兩加恩一體豁免以示優恤欽此

乾隆二十七年六月十六日軍機大臣等請在宗人府撥銀二十萬兩戶部撥銀三十萬兩交兩淮鹽政借商生息解交戶部爲宗室等賞項及旗員借俸之需奉

上諭宗人府滋生銀兩著停止借給其未完舊欠及借過俸銀

著加恩免息展限坐扣但旗員俸銀無幾養贍身家行走差使恐已不敷如遇婚喪事件更慮拮据嗣後竟停止借俸量加賞項其如何賞給之處軍機大臣速行議奏欽此

乾隆三十年二月十六日奉

上諭朕此次南巡體恤兩淮眾商先期傳諭不令捐輸煩費而伊等趨事踴躍甚屬可嘉著加恩均照本身職銜各加一級  
欽此

乾隆三十四年八月二十日奉

上諭江南海州所屬鹽場地方本年夏雨稍多稻秫未免歉收所有該屬上年借給口糧一萬餘石若照例催徵竈力不無

拮据著加恩緩至明年麥熟後徵收以示體恤欽此

乾隆三十五年十月奉

上諭從前停止生息銀兩後曾經兩淮商人懇請賞給以禪生計是商人借帑營運於伊等甚爲有益著李質穎卽於兩淮應解內務府銀兩內扣銀十萬兩酌量分給各商照從前賞借款項之例一分起息每年將息銀解交內務府收貯以備火器營支用欽此

乾隆三十五年奉

上諭尤拔世貢物係交商承辦若著令賠繳尤拔世勢必仍令商人按數補解又致累及眾商著加恩免其賠繳欽此

互見恤商



乾隆三十六年十一月三十日奉

上諭本年恭逢

皇太皇八旬萬壽兩淮長蘆浙江等處商人來京恭辦

慶典踴躍可嘉業已優加賞賚並將淮商提引案內應繳銀兩再行展限以示體恤更念該商等一體辦公而總商甲商叨恩獨厚其餘眾商未能徧逮因傳旨詢問李質穎等令就各處情形查明具奏今據奏覆所有兩淮之梁鹽安鹽二種成本原自不同價值不應一例著將淮商之梁鹽每斤增價二釐安鹽每斤減價二釐在物價衰益既以適均民商亦爲交便其長蘆商人應完三十六年引課錢糧准其分作三年

帶徵以紓商力山東商人應領額餘引五萬道淮其停領三年其應完正雜課銀仍照舊輸納兩浙商人淮每引加餘鹽五斤以三年爲限如此分別加恩庶總散各商得以同霑愷澤其沐

慈恩用廣推仁至意欽此

乾隆三十八年八月鹽政李質穎奏兩淮總商江廣達等公捐銀四百萬兩以備軍需之用奉

旨嘉獎並交部照好善樂施之例從優議敘復奉

旨此事雖係江廣達程謙德二人出名呈請而其中所捐銀數自係眾商各就資本多寡量力奉公自應視其捐助之等差

以定錄敘之輕重方爲平允著李質穎查明某商名下捐銀若干按其數目定爲三等分別議敘欽此

謹按嗣江廣達等以項未交完不敢先邀議敘是年九月又奉

旨該商雖因資本轉運在外暫借官項但既屬奉公自應卽予議敘若俟借項全完再爲造報則須至四年以後爲期過遲或眾商中稍有變更沾澤未能均溥非所以勵急公之義至所謂銀數不過就引目均攤其多少亦可約計而得著李質穎卽爲查明按數分等造報請敘欽此

互見  
助軍

乾隆三十九年正月奉

上諭朕憐江廣達家產消乏加恩賞借庫銀三十萬兩令其作  
本生息以爲養贍之計今據江廣達稟稱一年利銀二萬六  
千兩爲數過多恐造化淺薄不能承受懇求轉奏每年願繳  
銀一萬兩充公等語所見非是查此項利銀上出朕恩下因  
眾商桑梓之義代爲生理今伊旣以銀數過多受之不安不  
如曲體商情每年減去一萬兩俾代辦之人營運從容心亦  
悅服而江廣達一年所得一萬六千兩聽資養贍揆之情理  
兩得其便如此酌定殊屬允協著傳諭江廣達遵行欽此

兩淮鹽法志卷六